



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

Anr.124/2016

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Gyltene Sylejmani kryesuese, Afijete Sada Gllgjani dhe Faton Ademi anëtarë, duke vendosur përkritazi me ankesat e Rrjetit Ballkanik për Gazetari Hulumtuese (BIRN) dhe Internews Kosova, me seli në Prishtinë, paraqitur kundër subjekteve politike Partia Demokratike e Kosovës (PDK) dhe Nisma për Kosovën, të dyja me seli në Prishtinë, për shkak të vendosjes së posterave të kandidatëve të tyre për kryetar, të Komunës së Gllgocit, në Raundin e dytë të Zgjedhjeve të Jashtëzakonshme, në afërsi më të afërt se 100 metra nga Qendra e Votimit (QV), në ditën e votimit, në seancën e panelit të mbajtur me 21.12.2016, mori këtë:

V E N D I M

I. **Mirato**hen si të bazuara ankesat e Rrjetit Ballkanik për Gazetari Hulumtuese (BIRN) Anr.124/2016 të datës 19.12.2016 dhe Internews Kosova, me seli në Prishtinë, Anr.125/2016 të datës 19.12.2016, ashtu që, Subjekteve Politike Partia Demokratike e Kosovës (PDK), me seli në Prishtinë, i **shqiptohet dënimi** më gjobë, në shumë prej 3,000.00 euro (tremijë) dhe Nisma për Kosovën, me seli në Prishtinë i **shqiptohet dënimi** në shumë prej 3,000.00 euro (tremijë), për shkak të vendosjes së posterave të kandidatëve të tyre, për kryetar të Komunës së Gllgocit, në një afërsi më të afërt se 100 metra nga Qendra e Votimit (QV), në ditën e votimit, datë 18.12.2016.

II. Subjektet politike, Partia Demokratike e Kosovës (PDK) dhe Nisma për Kosovën të dyja me seli në Prishtinë, **detyro**hen ti paguajnë gjokat e shqiptuar si në pikën -I-, të dispozitivit të këtij vendimi, në afat prej 15 (pesëmbëdhjetë) ditëve nga dita e pranimit të këtij vendimi, nën kërcënimin e ekzekutimit me dhunë.

A r s y e t i m

Parashtruesi i ankesave Rrjeti Ballkanik për Gazetari Hulumtuese (BIRN) dhe Internews Kosova me seli në Prishtinë, me datë 19.12.2016, ka parashtruar dy ankesa Anr.124/2016, dhe Anr.125/2016, në PZAP, kundër subjekteve politike Partia Demokratike e Kosovës, Nisma për Kosovën, të dyja me seli në Prishtinë, në të cilat kanë pretenduar se në shkollën fillore "Xheladin Gashi – Plaku", në fshatin Komoran të Komunës së Gllgocit, në ditën e votimit, me datë 18.12.2016, në kundërshtim me nenin 36 të Ligjit për Zgjedhjet e Përgjithshme në Kosovë, LZP-së, në perimetrin brenda 100 metrave, brenda hapësirës së Qendrës së Votimit 0302e, janë vendosur poster të kandidatëve për kryetar të komunës nga radhët e subjektit politik PDK, dhe kandidatit të subjektit politik Nisma për Kosovën. Më këtë rast parashtruesi i ankesave, për ti argumentuar pretendimet e parashtruara në ankesat e lartpërmendura, i ka bashkangjitur si dëshmi një video – incizim në CD.

PZAP-i, për shkak të ekonomizimit të procedurës në këtë rast, pasi që parashtruesi i ankesës ishte i njëjtit edhe pse ankesat ishin parashtruar ndaj dy subjekteve politike të ndryshme PDK dhe NISMA, mirëpo shkeljet e pretenduara në ankesat Anr.124/16 dhe Anr.125/16 të datës 19.12.2016, janë të njëjtës natyrë dhe janë në të njëjtin vend, andaj ankesat e theksuar me lart PZAP-i, i ka bashkuar dhe janë vendos me një vendim, duke u bazuar në nenin 8 par. 3 të Rregullave dhe Procedurave të PZAP-it.

PZAP-i, në kuptim të nenit 6 paragrafi 6 të Rregullave dhe Procedurave të PZAP-it, ka informuar subjektin politik PDK dhe subjektin politik Nisma për Kosovën lidhur me ankesat e parashtruara nga BIRN të datës 19.12.2016, ju ka dhënë mundësinë që të përgjigjen në ankesat e lartpërmendura.

Në përgjigjen në ankesë të datës 20.12.2016, Subjekti politik PDK, thekson se në videon e shfaqur në CD, duket poster i kandidatit të PDK-së, por edhe i kandidatit të subjektit politik Nisma për Kosovën, mirëpo kjo video sipas subjektit politik PDK nuk ka as datë as kohë kur është realizuar kjo video, prandaj subjekti politik PDK, konsideron se pretendimet ankimore të BIRN dhe Interneës Kosova, janë të pa pabaza në këtë rast.

Subjekti politik Nisma për Kosovën, në përgjigjen në ankesë të datës 20.12.2016, thekson se subjekti Nisma ka përfill në tërësi heshtjen zgjedhore, nuk ka shpërndarë asnjë material i cili do të ndikonte tek votuesit. Më tutje subjekti politik Nisma për Kosovën në përgjigje thekson se fotoja qëndron e tillë prej raundit të parë zgjedhor dhe është në distancë me të madhe se 100 metra, dhe se fotoja e vendosur në shtyllë elektrike është jo vetëm e kandidatit të Subjekti politik Nisma për Kosovën por edhe e kundër kandidatit të subjektit tjetër.

PZAP-i, pasi që shqyrtoj pretendimet e palëve në procedurë, dhe të gjitha provat që gjenden në shkresat e lëndës, gjeti se:

Ankesat janë të bazuara

PZAP-i, vlerëson se nga video incizimi i cili gjendet si provë në shkresat e lëndës shihet qartë se distanca në mes të shtyllës dhe objektit të Qendrës së Votimit, ku është objekt i ankimit është në perimetër më të afërt se 100 metra, në të cilën shtyllë janë vendosur posteret e kandidatëve për kryetar të komunës së Glllogocit, nga radhët e subjekteve politike PDK dhe NISMA për Kosovën.

Prandaj PZAP-i, duke u bazuar në këtë gjendjen faktike të vërtetuar vlerësoj se, subjekti politik PDK dhe subjekti politik Nisma për Kosovën, kanë bërë thyerje e heshtjes zgjedhore, gjatë ditës së votimit për Raundin e dytë për Zgjedhjet e Jashtëzakonshme për kryetar të Komunës në Glllogoc, ku kanë vendosur posterë të kandidatëve të tyre në afërsi me të afërt se 100 metra nga Qendra e Votimit në shkollën fillore "Xheladin Gashi- Plaku" në Komoran të komunës së Glllogoc.

PZAP-i këto veprime të subjektet politike PDK dhe NISMA për Kosovën, i kualifikoj si shkelje ligjore të dispozitës së nenit 7 par. 1 pika a), Rregullës Zgjedhore Nr.11/2013, lidhur me nenin 36 par.1 pika a) të LZP-së, në të cilat dispozita ligjore parashihet se: *"Njëzetekatër (24) orë para hapjes së Qendrave të Votimit për hedhjen e votës, e deri në mbylljen e tyre, subjekteve politike, mbështetësve ose kandidatëve të tyre u ndalohet secili nga veprimet si shpërndarja ose shfaqja në mënyrë tjetër në ndënjërën nga Qendrat e Votimit, ose 100 metra brenda hapësirës së të njëjtës, e çfarëdo lloj*

materiali me qëllim ndikimi tek votuesit”, që në këtë rast siç u theksua me lart posterat e subjekteve politike që janë objekt i ankimimit ishin në një afërsi prej 100 metra brenda hapësirës së QV-së.

Me rastin e përcaktimit të lartësisë së gjobës të vendosur si në dispozitiv të këtij vendimi PZAP-i, ka marrë parasysh këto rrethana:

- Natyra e shkeljes dhe ndikimit të mundshëm të saj në procesin zgjedhor;
- Shkallën dhe peshën e shkeljes;
- Subjektet politik ka marrë pjesë në zgjedhjet e mëparshme dhe konsiderohet se kanë qenë të njoftuar me obligimet dhe përgjegjësit gjatë procesit të fushatës;
- Subjekti politik ka bërë shkelje të ligjeve zgjedhore në fuqi në këto zgjedhje si dhe në zgjedhjet e mëparshme në Kosovë si dhe
- Shumën e fondeve të marra nga subjekti politik prej Buxhetit të Republikës së Kosovës, për zhvillimin e aktiviteteve të lidhura më fushatën zgjedhore.

PZAP-i, me rastin e vendosjes ka marr parasysh edhe pretendimet nga subjektet politike PDK dhe NISMA, të parashtruara në përgjigje në ankesa, të cilët kanë theksuar se posterat në fjalë janë të vendosur në vendin e njëjtë që nga rundi i parë i zgjedhjeve të datës 04.12.2016, por të njëjtat i refuzoj si të pabazuara dhe te pa argumentuara me prova, ngase sipas LZP-së, i gjithë materiali propagandistik ku hyn edhe posterat, duhet të largohet nga vendi ku votohet respektivisht nga QV-ja, në një perimetër pre 100 metrave.

Parashtrimet tjera të subjekteve politik u cilësuan si pa ndikim në marrjen e vendimit më të favorshëm për subjekt në fjalë , për faktin se këta pretendimet nuk janë provuar. Palët janë të detyruara që të paraqesin fakte mbi të cilat i mbështesin pretendimet e veta dhe të propozojnë prova me të cilat vërtetohen ato fakte. Rregulla mbi barrën e provave, bije në subjekte politike që t'i provojë faktet mbi të cilat mbështesin parashtrimet e tyre. Për faktin se në rastin subjektet politike këtë nuk e ka bërë, e nga provat e administruara nuk mund të vërtetohet ekzistimit i fakteve mbi të cilat mbështetet këto pretendime PZAP-i, duke aplikuar drejtë rregullën mbi barrën e të provuarit vendosi që parashtrimet në përgjigje në ankesa të subjekteve politik refuzoi si të pabazuara.

Nisur nga të gjitha cekura me lartë, dhe duke u bazuar në nenin 118 par.1 si dhe nenin 120 par. 1 pika c). LZP-së, PZAP-I u vendos si në dispozitiv të këtij vendimi.

Paneli Zgjedhor për Ankesa dhe Parashtrësa në Prishtinë

Anr.124/2016 më datën 21.12.2016

**Kryesuesja e Panelit
Gyltene Sylejmani**



Këshillë juridike: Kundër këtij vendimi, mund të parashtrëhet ankesë e përbashkët nga të dy subjektet politike, në Gjykatën Supreme të Kosovës, pasi që gjoba e përbashkët ndaj dy subjekteve politike është mbi 5,000.00 Euro, në të kundërtën ndaj këtij vendimi nuk mund të parashtrëhet ankesa duke u bazuar në nenin 118.4 të LZP-së.